

Tujuh penumpang berdepan detik cemas, bas dinaiki terbalik

oleh ROSILAWATI ROSEDI 05 Februari 2023 02:16pm Masa membaca: 2 minit



Keadaan bas ekspres yang terbalik akibat kemalangan tersebut di jalan besar Jengka 2 pada Sabtu. - Foto ihsan PDRM

MARAN - Tujuh penumpang bas ekspres berdepan detik cemas selepas bas dinaiki mereka terbabas lalu terbalik di jalan besar Jengka 2 menghala ke Bandar Pusat Jengka pada Sabtu.

Dalam kejadian kira-kira jam 5.20 petang itu, kemalangan melibatkan bas dan sebuah kereta jenis Proton Saga.

Ketua Polis Daerah Maran, Deputy Superintendan Norzamri Abd Rahman memberitahu, pemandu bas berusia 57 tahun mengalami kecederaan di bahagian pinggang.

Menurutnya, siasatan awal mendapati, pemandu bas terbabit dari arah Maran menghala bandar Jengka dengan membawa tujuh orang penumpang.

"Apabila sampai di tempat kejadian, pemandu bas cuba memotong kereta yang berada di hadapan bas terbabit.

"Pada masa yang sama sebuah lori keluar dari jalan ladang di sebelah kanan jalan untuk masuk ke laluan utama jalan.

"Pemandu bas terkejut dan cuba masuk semula ke laluannya namun gagal lalu bergesel sisi kanan kereta dan kemudiannya terbabas dan terbalik di kanan jalan," katanya dalam kenyataan pada Ahad.

Tambah beliau, akibat kemalangan tersebut, pemandu bas dan tujuh penumpang mengalami kecederaan.

"Mereka semua dibawa ke Hospital Jengka bagi mendapatkan rawatan lanjut manakala pemandu kereta berusia 38 tahun selamat.

"Hasil siasatan awal mendapati kemalangan berlaku atas kecuaiannya pemandu bas gagal memotong kereta itu lalu bergesel dan terbalik ke sebelah kanan jalan," ujar beliau.

Dalam pada itu, Norzamri memberitahu, kenderaan terlibat akan menjalani pemeriksaan Puspakom selain mengesan saksi-saksi bebas untuk membantu siasatan.

Ujar beliau lagi, kes disiasat di bawah Seksyen 43(1) Akta Pengangkutan Jalan 1987.